

Evening Gojri News Bulletin 20 June 2024 at 1700 Hrs

ایوننگ گو جری نیوز بلیٹن مورخہ 20 جون 2024

یوہ آکا شوانی جموں ہے محمد مبارک ماہر تے ظفر اقبال تیں خبر سُنو۔ پہلاں خاص خاص خبر۔

*1- وزیر اعظم نریندر مو دی جموں کشمیر غا 2 روزہ دورہ ور اج پُج رہیا ہیں سرینگر۔ اس دوران غے دوران وے مچ سارا ترقیاتی منصوبیاں غی شروعات غے نال نال نوجواناں مانہہ تقرری نامہ وی بندیں گا۔

*2- فوج غو کہنو ہے جے وادی کشمیر غا رافیہ آباد علاقہ مانہہ 2 غیر ملکی دہشت گرداں مانہہ مار غے حفاظتی دستاں نے اک بڑی کامیابی حاصل کی ہے۔

*3- مُلک غا دوجا حصاں غی طرفوں پلک جموں خطہ مانہہ 10 وں عالمی یوگ تہاڑو مانیو جائے گو۔

*4- تے صدر جمہوریہ درویدی مُرمو نے کہیو ہے جے حساسیت اور شمولیت مہاری ثقافت تے تہذیب غو لازمی حصو رہی ہیں۔

خبراں غی تفصیل نال پہلاں محمد مبارک ماہر۔

PM Visit

وزیر اعظم نریندر مو دی عالمی یوگا تہاڑا غی تقریبات مانہہ حصول واسطے اج جموں کشمیر غا 2 روزہ دورہ ور آرہیا ہیں۔ اُن غو یوہ دورہ عالمی یوگا تہاڑا غا دسواں شمارہ غا موقعہ ور پلک عالمی توجہ مانہہ اپنے پاسے متوجہ کرے گو۔ واضع رہے جے وزیر اعظم نریندر مو دی غو مرکز مانہہ تیجی مُدت واسطے سرکار سنبھالناں توں بعد جموں کشمیر غو یوہ پہلو دورہ ہے۔ مذکورہ دورہ غے دوران وزیر اعظم سرینگر غا شیر کشمیر بین القوامی کانفرنس مرکز ایس کے آئی سی سی مانہہ نوجواناں مانہہ با اختیار بنان تے جموں کشمیر غی تبدیلی پروگرام مانہہ شرکت کریں گا۔ وے جموں کشمیر مانہہ 15 سو کروڑ روپیاں تیں متی مالیت آلا 84 بڑا ترقیاتی منصوبیاں غو افتتاح کریں گا تے نال ہی نی پتھر وی رکھیں گا۔ اپنا اس دورہ غے دوران وزیر اعظم نریندر مو دی 18 سو کروڑ روپیاں غی مالیت گا ذراعت تے اس سنگ جڑیا شعباں غا منصوبہ جے کے سی آئی پی مانہہ مسابقتی بہتری غو وی آغاز کریں گا۔ وزیر اعظم غا کشمیر غا دور روزہ دورہ غا سلسلہ مانہہ تگڑا حفاظتی انتظامات کیا گیا ہیں۔ حُکام نے دسیو ہے جے 7 ہزار تیں متا شرکاء پلک مشہور رٹل جھیل غے کنڈے یوگا تقریب مانہہ حصول غا واضع رہے جے مذکورہ 18 سو کروڑ روپیاں غی مالیت آلا منصوبیاں مانہہ جموں کشمیر غا 20 ضلعان گا 90 بلاکاں مانہہ عملیو جائے گو۔ اور منصوبیاں غی رسائی 3 لکھ گھراں تک وے گی جس مانہہ 15 لکھ مستفید شامل وین گا۔ وزیر اعظم نریندر مو دی جموں کشمیر غا نوجواناں نال اس تقریب غے دوران گل بات کریں گا تے نال ہی سرکاری شعباں مانہہ تعینات 2 ہزار تیں متا افراد مانہہ تقرری نامہ وی بندیں گا۔ لیفٹنٹ گورنر منوج سنہا نے سرینگر مانہہ 10 وں عالمی یوگا تہاڑا گا انعقاد غا انتخاب واسطے وزیر اعظم نریندر مو دی غو شکریو ادا کیو ہے۔

Encounter JK

حفاظتی دستاں نے دعویٰ کیو ہے جے اُنہاں نے 2 غیر ملکی دہشت گرداں نانہہ مار غے
 اک بڑی کامیابی حاصل کی ہے۔ قابل ذکر ہے جے گذشتہ کل فوج نے وادی کشمیر غا ہادی
 پوری رافیہ آباد علاقہ مانہہ یہ دو دہشت گرد مار مکایا تھا۔ اک پریس کانفرنس مانہہ 7
 راشٹریہ رائفل سیکٹر غا کمانڈر دیپک نے دسیو ہے جے گذشتہ کجھ تہاڑاں توں ان دہشت
 گرداں غی سوپور رافیہ آباد مانہہ ہون غی سولہ رہی تھی تے گذشتہ کل جموں کشمیر
 پولیس غی طرفوں اک پکی اطلاع ملن توں بعد فوج، جموں کشمیر پولیس تے سی آر پی
 ایف غی سانجھی کاروائی غے دوران تصادم مانہہ یہ دہشت گرد مار مکایا ہیں۔ قابل ذکر ہے
 جے یہ دہشت گرد رافیہ آباد ہادی پورہ علاقہ مانہہ اک کپڑا چھپیا وا تھا۔ ماریا
 گیا دوہاں دہشت گرداں غو تعلق لشکر طیبہ نال تھو جہیڑا جے سال 2020 توں وادی
 کشمیر مانہہ سرگرم تھا۔ ان دہشت گرداں غی پشان عثمان تے عمر غا طور ور ہوئی ہے۔
 فوج گا افسر نے مزید جانکاری دیتاں واں دسیو ہے جے دہشت گرداں غا مارن توں بعد ان
 کولوں متی تعداد مانہہ گولی سکو وی برآمد ہووے ہے۔ فوج غا افسر نے کہیو ہے جے اُنہاں
 نانہہ دہشت گردی غا خاتمہ واسطے لوکاں غی بھرپور مدد حاصل ہو رہی ہے۔

World Refugee Day

ہر سال 20 جون نانہہ رفیو جی تہاڑو منایو جائے۔ اس تہاڑا غا منان غو مقصد رفیو جی لوکاں
 غا بارے عام عوام نانہہ بیدار کر غے عالمی سطح ور یوہ پیغام دینو ہے جے وے رفیو جی
 لوکاں نانہہ رہن واسطے جگہ دیں۔ یوہ تہاڑو عالمی سطح ور مل جُل غے رہن تے اک دوجا
 سنگ ہمدردی نال رہن غو وی درس دیں۔ سال 2024 واسطے رفیو جی تہاڑا غو عنوان ہے
 ”پوری دنیا مانہہ رفیوجیاں نانہہ خوش آمدید“ یا درہ جے 20 جون 2001 نانہہ پہلی دفعہ
 عالمی رفیو جی تہاڑو منایو تھو۔ رفیو جی تہاڑا نانہہ پہلاں افریقہ رفیو جی تہاڑا غا طور ور
 منایو جائے تھو تے بعد مانہہ دسمبر 2000 مانہہ اقوام متحدہ جنرل اسمبلی غی طرفوں اس دن
 نانہہ بین القوامی رفیو جی تہاڑو قرار دتو تھو۔

IMD Weather

بھارتی محکمہ موسمیات نے دسیو ہے جے گرم لوتوں مُلک غا لوکاں نانہہ اگلا کجھ تہاڑاں
 مانہہ راحب لہے گی۔ محکمہ موسمیات نے سخت لوتوں راحت لین غی وجہ شمال مغربی
 مشرقی تے مرکزی بھارت مانہہ مونسون تے گرج چمک غے سنگ بارش ہون غی وجہ
 دسی ہے۔ آکاشوانی سنگ گل کرتاں واں بھارتی محکمہ موسمیات غا سائینسدان سوما سین
 رائے نے کہیو ہے جے جنوب مغربی ہواں غا اُتھل پُتھل غی وجہ توں مُلک غا بیشتر حصاں
 مانہہ لوکاں نانہہ گرم لوتوں راحت لہے گی۔ جد کہ اتر پریش مانہہ لوتوں اسے طرح رہے گی۔
 ڈاکٹر رائے نے مزید دسیو ہے جے گواہ، کرناٹک تے مہاراشٹر مانہہ اگلا 4/3 دنان مانہہ
 تیز بارش ہون گا امکان ہیں۔ محکمہ موسمیات نے مزید جانکاری فراہم کرتاں واں دسیو ہے
 جے اس مہینہ غی 21 تاریخ تک وادی کشمیر تے جموں صوبہ مانہہ ہلکی بارش تے سخت
 چکھڑ چُلن غو امکان ہے۔ محکمہ موسمیات جموں گا اک عہدیدار نے دسیو ہے جے 22 تے
 23 جون نانہہ جموں کشمیر غا کجھ اک مقامات ور ہلکی بارش تے گرج چمک غے نال بدل
 برن غو امکان ہے۔ محکمہ موسمیات نے مزید جانکاری دتی ہے جے 24 جون توں 27
 توڑی موسم عام طور ور خشک رہے گا۔ جد کہ کجھ اک مقامات ور ہلکی بارش وی ہو
 سکے۔ محکمہ موسمیات غے مطابق 22 جون توں جموں غا میدانی علاقان مانہہ گرم لوتوں
 غا رہن غا امکان ہیں۔

IYD Samba

مُلک گادوجا حصال غی طرح ضلع سانہ مانہ وی یوگ با رے عالمی تہاڑا غی 10 ویں تقریب منعقد کی جا رہی ہے۔ اس سلسلہ مانہ محکمہ آبوش سانہ غی طرفوں تمام تر انتظامات کر لیا گیا ہیں۔ مذکورہ تہاڑا غی اصل تقریب سانہ اراضی کھیڈ میدان مانہ منعقد کی جائے گی۔ مہارا سانہ غا نامہ نگار ستیال شرمانا ل گل کرتاں واں آبوش نوڈل افسر سانہ ڈاکٹر رینوداس نے اس طرح کہیو۔۔۔ بانٹ۔۔۔

IYD Jammu

ویشو یوگ سنستھان نے بین القوامی یوگا تہاڑا غا سلسلہ مانہ ہر کی پوڑی جموں مانہ یوگا تہاڑا منان با رے اک یوگا مشق کی۔ جت متی تعداد مانہ لوکاں نے یوگا مشق مانہ حصو لیو۔ ویشو یوگ سنستھان نے لوکاں نانہ اپیل کی جے وے کل بین القوامی یوگا تہاڑو منان غا سلسلہ مانہ متی تعداد مانہ آغے شمولیت کریں۔ اس سلسلہ مانہ مہارا ضلع غا نمائندہ سنگ گل کرتاں واں یوگ گورو کرن سنگھ نے اس طرح کہیو۔۔۔ بانٹ۔۔۔

یہ خبر تم آکا شوانی جموں تیں سن رہیا ہیں خبراں غا باقی حصہ نال ظفر اقبال۔

Doda IYD

ضلع ڈوڈہ مانہ بین القوامی یوگا تہاڑو منایا جان غا سلسلہ مانہ سپورٹس سٹیڈیم مانہ یوگا سیشن منعقد ہوؤ ہے۔ قابل ذکر ہے جے ضلع مانہ بین القوامی یوگا تہاڑو 21 جون نانہ اسے جگہ تے بہدرواہ غا گاتھا پارک مانہ منایو جا ئے گو۔ ضلع ترقیاتی کمشنر ڈوڈہ ہر ویندر سنگھ نے ضلع غا لوکاں نانہ اپیل کی ہے جے وے صحت مند تے تندرست رہن واسطے یوگا مانہ حصو لیو۔ اس سلسلہ مانہ بولتاں واں ضلع ترقیاتی کمشنر نے اس طرح کہیو۔۔۔ بانٹ۔۔۔

Rajouri IYD

ضلع راجوری مانہ بین القوامی یوگا تہاڑا منان غی تیاری عروج ور ہیں۔ اس سلسلہ مانہ بھارتی فوج نے علاقہ مانہ بچیاں واسطے یوگا غی مشق ضلع راجوری گا قبضہ لکیر غانزدیکی علاقہ ڈونگی مانہ رکھ غے مقامی بچیاں نانہ یوگا غا فائدہ با رے اُجاگر کیو۔ یوگا مانہ مشق کرن آلی بچیاں نے بھارتی فوج غو شکر یوادا کیو۔ اس سلسلہ مانہ بولتاں واں بچیاں نے کہیو جے ہم فخر محسوس کر رہیں ہاں جے مُلک غا وزیر اعظم جموں کشمیر مانہ آغے یوگا غی مشق کریں گا۔ اس سلسلہ مانہ مہارا نمائندہ سنگ گل کرتاں واں یوگا ہدایت کار مونیکا تے یوگا مشق مانہ حصو لین آلاں نے اس طرح کہیو۔۔۔ بانٹ۔۔۔

Poonch IYD

بین القوامی یوگا تہاڑا منایا جان غا سلسلہ مانہ ضلع پونچھ گا کرشن چندر پارک مانہ ضلع غا سماجی بہبود محکمہ تے تائی کوانڈو تنظیم نے اک کیمپ منعقد کرایو۔ اس کیمپ مانہ متی تعداد مانہ تائی کوانڈو غا کھلاڑیاں نے شمولیت کی۔ ضلع مانہ یوہ کیمپ منعقد کرا غے لوکاں نانہ اپیل کی گئی جے وے بین القوامی یوگا تہاڑا غی مشق مانہ متی تعداد مانہ حصو لے غے یوگو کریں۔ اس سلسلہ مانہ بولتاں واں سماجی بہبود غی افسر پرینکاسنگھ، تائی کوانڈو غا کوچ راجندر سنگھ تے بچاں نے اس طرح کہیو۔۔۔ بانٹ۔۔۔

Kathua IYD

ڈپٹی کمشنر کٹھوعہ ڈاکٹر راکیش منہاس نے تمام شہریاں تیں اپیل کی ہے کہ وے پلک سویرے 6 بجے تیں کھیڈ میدان کٹھوعہ مانہہ منعقد ہون آلا یوگا غا 10 واں عالمی تہاڑا غی تقریب مانہہ حصول لیں۔ اُن نے کہیو کہ یوگا سب واسطے بہت فائدہ مند ہے اور اس نانہہ روز مرہ غی عادت غا طور رور اپنان غی لوڑ ہے۔ اس سلسلہ مانہہ بولتاں واں ڈی سی کٹھوعہ نے اس طرح کہیو۔۔۔ بانٹ۔۔۔

President Divyang Student

صدر جمہوریہ درویدی مرمو نے اج نوی دہلی مانہہ پنڈت دین دیال اُپا دھیائے قومی ادارہ برائے جسمانی معزوری غو دورو کیو۔ اپنا دورہ غے دوران صدر جمہوریہ نے معزور بچاں اور طلباء سنگ گل بات کی تے نال ہی ثقافتی کارکردگی غو مشاہدو کیو۔ اجتماع سنگ خطاب کرتاں واں صدر جمہوریہ نے کہیو کہ کسے مُلک یاہ معاشرہ غی ترقی غو اندازو اس مُلک یاہ معاشرہ غا لوکاں غی طرفوں معزوراں بارے دسی جان آلا حساسیت تیں لایو جا سکے۔ اُنہاں نے کہیو جے حساسیت تے شمولیت مہاری ثقافت اور تزیب غی شاہ رگ ہے۔ صدر جمہوریہ نے معزور بچاں نانہہ سماجی تے اقتصادی طور رور باختیار بنان بارے کم کرن خاطر ادارہ تیں وابستہ تمام لوکاں غی تعریف کی۔

اس غے نال ہی خبراں غو یوہ بلیٹن ختم ہوؤ۔